



Grunnegers

t Gebeurde veur n joar of wat ien vekaanzietied. Wie zaten doudestieds nog nait zo vaast aan schoulreusters as tegenworreg, t was vro ien junimoand.

n Schiere nommiddag op t aailand. Aigelks mout je Aailand schrieven, mit n hoofdletter: t is ja n aander woord veur Schiermonnikoog. Toch nog n bult drokte, want zo kort veur de vekaanzietied binnen der hail wat schoulraaiskes en zukswat. Ik loop aan rechterkaant van weg over Middenstreek, even veurbie t drokste stee doar, bie Klontje zien bakkerij. Aan rechterkaant lopen mag aigelks nait, mor op t Aailand rieden zowat gain auto's, dat vooruit mor. Leujong aan rechterhaand en dat snoatert en naist ien ain taim deur, zo heurt dat veur leujongs. Ridt ons n man op fiets veurbie, kikt om (n goie viefteger zo te zain) en zegt: „Dat heur je nait voak meer, kiender dij Grunnegers proaten”. Op zo'n moment mout je wat weerom zeggen, wàt dat gef t nait zo veul, as t mor rad komt, en zeg: „Der binnen nog gonnent dij t zulfs gewóón doun”. Man kikt nog n moal om en bèlkt: „Nait zulfs, mor allerdeegs” en vot was e. Ik kon man nait, mor dou docht ik: Geert Genoat, wel aans?

GESNOATER

Wie laipen stoaregaan deur. Nait slim haard, wnt zuk gesnoater drukt t tempo van luttje kiender zo te reken. Kommen bie Kolstein om t ain of t aander te kopen en doar heur ik massakerel proaten mit ons veurbie-fietser. t Was Geert veur en Geert noa. Dou wis ik: Geert Genoat, wel aans? Geert Genoat, dij aal joaren op Schier woonde, dij allerdeegs (!) aanderhaalf joar ien mien begelaaidens-kemizzie zeten haar, mor ik haar hom nog nooit zain en doar zai je mor weer aan, dat t Aailaand wieder weg is as je wel ais denken.

Deur t gerevel van n lukkereltje heb ik Geert Genoat kennen leerd, en zo zai je óók dat Grunnegers proaten mit joen kiender nog aargenswoar goud veur wezen kin. Ie valen der mit op! Je kinnen t ook aansom zeggen en din heurt t net eefkes negatiever: der is hoast gainent meer dij t nog dut, en haildal nait ien t openboar, stelt joe veur dat n aander t heuren zol....

Ze zeggen dat t beter is veur joen kiender dat ie heur gain Grunnegers leren. Ze hemmen ook hail laank zegd, dat wereld plat was. Ze zeggen dat schoulmeesters zeggen, dat t veur heur bestwil is as ze Hollands kinnen en gain Grunnegers (Veur wel zien bestwil?—. Ik heb leste vattien doag mit n stuk of honderd schoulmeesters contact had en der was gain ain bie dij dat beweerd het.....

AIN TOAL

Ze zeggen dat kiender mor ain toal leren mouten, aans kin t bie heur ien kloeten lopen goan.. Zo langzoamaan begun ik te laggen: wat vienden ze aal nait oet om te verzwiegen dat ze heur schoamen veur toal van moeke, heurzulf en van noabers. Man, man. Dij aigenste kiender dij gain twij toalen heuren magen as ze n joar of vaaiier, vief binnen -ien heur „toalgevuilege periode”- dij magen as ze twaalf binnen zeker wel Fraans, Duuts en Engels der bie leren en hoogvlaigers ook nog Grieks en Letien en n poar joar eerder gain Grunnegers?

Zellen wie dij lu dij zukse oetvluchten bedenken, zel wie dij hail vandoag de dag slichtweg positief binnen over toal van dit stukje van Nederland? Meschain kin wie ien tussentied t ook nog even op n akkoordje gooien over vekaanzietied: proat dizze raais ais gewoon Grunnegers, ook ien t boetenlaand. Wel wait, wèl of je apmoal kennen leren van t zummer.....

Siemon Reker